



Groupe parlementaire

Här Claude Wiseler

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, den 13. Januar 2026

Här President,

esou wéi d'Chambersreglement et virgesäit, bieden ech lech, dës parlamentaresch Fro un d'Madamm Gesondheets- a Sozialminister weiderzeleeden.

Esou wéi et am Artikel "*CNAP mat Kappzerbrieche a vill méi Aarbecht konfrontéiert*", deen den 12. Januar op RTL.lu publizéiert gouf, heescht, stellt déi rezent Pensiounsreform, d'Mataarbechter vun der Pensiounskeess (CNAP) viru massiv Erausforderungen. Notamment war sech d'Direktioun laang onsécher, wéi d'Reform rechtssécher ëmzesetzen ass. De Risiko vu juristesche Recourse besteet och weiderhin. Och d'Retraite progressive soll der Madamm Minister no zwar vum 1. Januar u kënnen ugefrot ginn a spëtstens a véier Méint a Kraaft trieden. Elo heescht et awer bäi RTL, datt de System fir déi progressiv Pensioun unzefroen, nach net operationell ass. No Ausso vun der Madamm Minister an der Kommissiounssitzung vum 8. Dezember 2025 soll dës Demande kënnen iwwer MyGuichet gestallt ginn.

Des Weideren heescht et am Artikel, datt eng ronn 100 Leit sollen nei bäi der CNAP agehallt ginn. Enn 2024 louch d'Gesamtzuel vum Personal bäi 242, et handelt sech also ëm eng Erhéijung vun iwwer 40 Prozent. Trotzdeem gëtt d'Madamm Minister am genannten Artikel mat de Wieder zitéiert, datt d'Reform zwar "*natierlech méi Aarbecht géing mat sech bréngen, mee net an deem Ausmooss ewéi geduecht*".

An deem Zesammenhang géif ech der Madamm Gesondheets- a Sozialminister gär dës Froe stellen:

- 1) Wéi reagéiert d'Madamm Minister allgemeng op den Artikel a besonnesch op de Fakt, datt d'Direktioun vun der CNAP muss dovun ausgoen, datt hir Ëmsetzung an d'Interpretatioun vun der Reform riskéieren, geriichtlech ugesicht ze ginn?
- 2) Kann d'Madamm Minister eng Tabell presentéieren, déi déi 100 Plazen no der jeeweileger Karriär, CDDen an CDlen, externen Ausschreiwunge souwéi Changements d'administration regroupéiert an all Kéiers preziséieren, ob d'Astellung mat engem Stage verbonnen ass a wéi laang dee géif daueren?
- 3) Kann d'Madamm Minister matdeelen, wéi eng Qualifikatioun d'Kandidate musse matbréngen? Ginn och gezielt Juristen agehallt, fir op potenziell Gerichtsaffäre virbereet ze sinn?
- 4) Wéi wäit wäerten déi 100 Leit mat der operationeller Integratioun vun der Reform an d'Aarbechtsfleef vun der CNAP befaasst ginn? Wéi eng aner Aufgabe kënnen si méiglecherweis iwwerhuelen, nodeems de Projet ofgeschloss ass?
- 5) Ëmfaassen dës 100 Plazen och d'Neibesetzung vu Leit déi an d'Pensioun ginn oder d'CNAP aus soss engem Grond verloossen? Falls jo, kann d'Madamm Minister déi entspriechend Zuele matdeelen? Falls net, kann d'Madamm Minister matdeelen, wéi vill zousätzlech Plaze fir eventuell Neibesetzungen 2026 mussen ausgeschriwwen ginn?
- 6) Eng kuerzfristeg Erhéijung vum Personal ëm 40 Prozent bedeit dacks och eng logistesche Erausforderung. Kënnen déi 100 Leit all a bestoende Raimlechkeete vun der CNAP

ënnerbruecht ginn? Falls net, wéi eng zousätzlech Lokalitéite si fir si virgesinn? Kann d'Madamm Minister d'Käschte vun der Locatioun, respektiv dem Kaf preziséieren?

- 7) A wéi engem Zäitraum mengt d'Madamm Minister dësen Astellungsprozess kënnen ofzeschléissen? Wéi een Zäitraum gëtt duerno fir d'Formatioun vun deene Leit agerechent? Wéi ee Réckstau un Dossiere kéint sech schlëmmstefalls erginn, bis déi 100 Leit voll operationell sinn?
- 8) Bis wéini sollen déi technesch Dispositiounen fir d'Demande vun der progressiver Pensioun operationell sinn? Kann d'Madamm Minister garantéieren, datt all Bierger dee säit dem 1. Januar 2026 Usproch op eng progressiv Pensioun huet, dës och kann ufroen? Wéi gesäit déi genee administrativ Prozedur aus?
- 9) Iwwert wéi eng Kenntnissener vum eisen dräi administrative Sproochen müssen d'Kandidaten verfügen, wuelwëssend, datt de Kontakt mam Public hei naturgeméis virun allem eeler Persounen betrëfft?
- 10) Kann d'Madamm Minister eng Tabell presentéieren, déi regroupéiert, wéi wäit sech d'Gesamtkäschte vun der CNAP verdeelt op déi verschidde Posten (Salären, Raimlechkeeten, Material asw.) duerch dës Rekrutement erhéicht?
- 11) D'Madamm Minister gouf wéi uewen ausgefouert, vum RTL mat de Wieder zitéiert, datt d'Ëmsetzung vun der Reform manner Opwand mat sech bréngt, wéi erwaart. Vu wéi engem zousätzlechen Personalbedarf war d'Madamm Minister deementspreechend ursprénglech ausgegangen?

Mat déiwem Respekt,



Alexandra Schoos
Deputéierten